

KANTIK

Parrez POULDREUZIC

Parrez POULDREUZIC



INTRON VARIA PENNC'HORS

DISKAN

{ *Mari, hor mamm e harz ar mor,*
 { *A zo evidomp eun tenzor ;*
 { *Burzudou a ra bep mare*
 { *Aman evit he-bugale.*

Etre Penmarc'h ha Beg-ar-Raz
 Zo savet e pleg ar mor braz
 Eur chapelig euz ar brava,
 Evidoc'h, Intron Varia.

Chapel Pennc'hors eo he hano.
 Ama guir zikour ho pezo,
 Evit ho korf hag hoc'h ene
 Digant ar Verc'hez, Mamm Doue.

D'an eiz euz a viz Guengolo,
 Ema ar pardon bras eno :
 Treuzou an iliz zo uzet
 Gant boutou ar belerinet.

Hon tadou koz e peb amzer
 A gave aman ho mamm ger ;
 Enoc'h, Mari, a oll viskoaz
 Ho doa lakeet eur fianz vraz.

En ho foan hag en ho enkrez,
 D'ho kaout e teuent, ô Guerc'hez !
 Ha sikour ho dije bepred
 Diganeoc'h, mam an oll remed.

Guerc'hez Vari, Mamm da Zoue,
 Ni zo ive ho pugale :
 Karet oc'h bet gant hon tadou
 Ha ni ro d'eoc'h hor c'halonou.

Er bed-ma, allas ! reuzeudig
 Ez omp oll paour ha pinvidig ;
 Gant an anken hag ar c'hlenved
 Ez omp oll bep mare krignet.

Hor c'horf en deuz e glenjejou
 Hag hon ene e c'houlidou :
 Hor mamm a gav bepred ive
 Remed d'an eil ha d'egile.

Redomp eta gant levenez
 Da gaout Mari hor rouanez ;
 He galloud a zo heb he far
 Var ar mor ha var an douar.

Nag a c'hraz, Intron Varia,
 Oc'h euz bet roet er chapel-ma
 D'an neb a zo deut gant fianz
 D'en em strinka en ho prezanz.

Intron Varia, guir zikour,
 Davedoc'h e teu ar c'hlanvour
 Da c'houlen aman ar iec'hed
 En he oll boaniou diremed.

Bepred kaloun ar vamm dener
E deuz truez ous he mab ker ;
Chilaouet e deuz he beden :
Hep dale en deuz e c'houlèn.

Nag a dud klaon var ho guele,
A hirvoude hag a vouele,
Ho deuz bet raktal ar iec'hed,
Pa ho deuz deoc'h en em vouestlet.

Meur a vamm, dre ho madelez,
A zo bet dalc'het e buez,
Hag ho deuz bet ar joa zoken
Da velet ho bugel kristen.

Kalz a dud epad ar brezel
Ho deuz bet sonj euz ho chapel,
Ha nikun n'en deuz ho pedet,
Guerc'hez, heb beza chilaouet.

Hor madou e kreiz an tan-goal,
Nag a vech evit ho diual,
N'hon euz-ni ket d'eoc'h ho gouestlet ?
Ha hep tro oc'h euz ho miret.

An ti zo e poultr ha ludu
Ma na jench ket an avel tu ;
Astenn a rit neuze ho prec'h :
Raktal an avel a jench lec'h.

Mont a rimp evit hoc'h enor
D'ho chapelig e harz ar mor,
Evit trugarekaat ar vamm
E deuz hor miret ouz ar flamm.

Tolit ho lagad var ar mor :
Setu ema en he fulor,
Prest da lonka tud ha madou
Ebars goueled he abimou.

Sellit ! eur vagig zo aze,
E kreiz an tarz euz ar mor-ze,
Ha piou allas ! he sikouro ?
Guerc'hez Vari, c'huï he dalc'ho.

Tud kez, epad ar goall amzer
Na zizonjit ket ho mamm ger ;
Var bordig ar mor direiz,
A velit savet he ilis.

Hed an noz, en denvaligen,
Mari a vo ho stereden ;
Hag Intron Varia Bennc'horz
Var eeun ho reno glog er porz.

Eur vagig e kreiz ar mor bras,
Gant an avel foll a dreuzas :
Eur paourkez, evit en em denn,
N'en doa ken nemet eur plankenn.

Istribil ouz he blankennig
Hen a velaz eur chapelig :
Chapel an Intron Varia,
Anaveet ganta pell a oa.

« Intron Varia beniget,
Sikour, sikour 'ta, me ho ped, »
Emezan, epad he anken :
Hag ar vamm a glev he beden.

Hen tennet e deuz a c'h'lac'har,
Deut eo dibistig en douar ;
Buntet ma zeo gant an avel,
Ec'h arru e tal ar chapel.

Mez, Mari, piou a lavaro
Ar grasou oc'h euz roet d'ar vro,
Abaoue ouspenn c'houec'h kant vloaz,
Ama var bordig ar mor braz ?

Nan, den na zisklerio, Guerc'hez,
Ar brasder euz ho madelez ;
N'euz nemet Doue hag a oar
Ar vad oc'h euz gret d'an douar.

Redit eta da gaout Mari,
Deut oll gant fianz d'he fidi
En he chapel e harz ar mor
Pa vezo ar pardon digor.

Vu et approuvé avec autorisation d'imprimer.

Quimper, le 16 Septembre 1859.

SAUVEUR, vic. gén.